

	<h1>SLUŽBENE NOVINE OPĆINE GORAŽDE</h1>	
Godina V	17. septembar 2012. godine GORAŽDE	Broj 8

0909

Na osnovu članova 8. i 13. Zakona o principima lokalne samouprave u Federaciji Bosne i Hercegovine ("Službene novine F BiH", br. 49/06) i članova 18. i 84. Statuta Općine Goražde („Službene novine Bosansko-podrinjskog kantona Goražde“ broj 13/07), Općinsko vijeće Općine Goražde, na 43. redovnoj sjednici, održanoj dana 30.08.2012. godine, donosi:

O D L U K U

o jedinstvenom načinu raspolaganja, upravljanja i zaštiti stanova na kojim pravo raspolaganja ima Općina Goražde

I. OPĆE ODREDBE

Član 1.

Ovom se Odlukom utvrđuje jedinstveni način raspolaganja, upravljanja i zaštite stanova na kojima pravo raspolaganja ima Općina Goražde.

Član 2.

Stanom se, u smislu ove Odluke, smatra skup prostorija namijenjenih za stanovanje sa pomoćnim prostorijama koje po pravilu čine jednu građevinsku cjelinu i imaju zasebni ulaz. Pod pomoćnim prostorijama podrazumijevaju se prostorije koje se dodjeljuju uz stan.

Član 3.

Stanovi na kojima ima pravo raspolaganja Općina Goražde su:

- stanovi u vlasništvu Općine Goražde, kod kojih je vlasništvo stečeno po bilo kom pravnom osnovu,
- stanovi iz člana 13. Zakona o prestanku

primjene Zakona o napuštenim stanovima koji nisu dodijeljeni u skladu sa Zakonom o vraćanju, dodjeli i prodaji stanova.

II. UPRAVLJANJE

Član 4.

Poslovi upravljanja stanovima su poslovi stalne brige o tekućem i investicionom održavanju i blagovremeno poduzimanje pravnih i drugih radnji na zaštiti stanova od nezakonitog korištenja istih te preduzimanje drugih mjera u cilju domaćinskog upravljanja stanovima.

Poslove upravljanja na stanovima iz člana 3. ove Odluke u ime Općine vrši načelnik Općine Goražde putem nadležne općinske službe za stambene poslove (u daljem tekstu: nadležna služba).

U cilju obavljanja poslova iz stava 2. ovog člana obavezuje se načelnik da putem nadležne službe uredno vodi evidenciju svih stanova na kojima pravo raspolaganja ima Općina, koja će sadržavati: adresu stana, strukturu i površinu, vrstu materijala od kojeg je izgrađen, godinu izgradnje, građevinsku vrijednost i tržišnu vrijednost.

Načelnik Općine može ugovorom pojedine poslove upravljanja prenijeti na ovlaštena lica registrirana za te poslove.

II. RASPOLAGANJE STANOVIMA

Član 5.

Općina Goražde raspolaže stanovima tako što ih može otuđiti, dati u zakup ili na korištenje.

a) Prodaja stanova

Općinsko vijeće može odlučiti da pojedine stanove proda iz stambenog fonda Općine Goražde ako će se

time postići veća korist za Općinu Goražde.
Odluku o prodaji stanova donosi Općinsko vijeće na prijedlog načelnika Općine.

Član 6.

Otuđenje stana se vrši u skladu sa Zakonom o prometu nepokretnosti.

U pogledu postupka i načina otuđenja stanova putem javne prodaje primjenjuje se Pravilnik o postupku javnog nadmetanja za prodaju nepokretnosti u društvenoj svojini.

Stanovi iz člana 13. Zakona o prestanku primjene Zakona o napuštenim stanovima mogu se privatizovati u skladu sa Zakonom o vraćanju, dodjeli i prodaji stanova.

b) Pravo na dodjelu stana u zakup

Član 7.

Pravo na dodjelu stana u zakup, prema odredbama ove Odluke, imaju:

- osobe koje nemaju riješeno stambeno pitanje niti mogućnost da ga riješe na drugi način, a prije podnošenja zahtjeva imaju prebivalište na području općine Goražde neprekidno najmanje deset (10) godina;

- osobe koje stanuju u stambenim objektima koji je vlasništvo općine Goražde, a za koje je izdato rješenje kojim se nalaže uklanjanje objekata zbog njihove devastiranosti;

- osobe za koje postoji obaveza davanja stana u zakup na temelju zakona i pravosnažnih sudskih presuda.

Pravo na dodjelu stana u zakup nemaju osobe iz predhodnog stava ovog člana ako na području općine Goražde one ili članovi njihovog porodičnog domaćinstva imaju u vlasništvu useljivu kuću ili stan.

Osobama iz stava 1. ovoga člana stan se daje u zakup na određeno vrijeme, na tri godine.

Član 8.

Osobom koja nema riješeno stambeno pitanje, niti mogućnost da ga riješi na drugi način u smislu člana 7. smatra se:

- osoba koja na području općine Goražde nema u vlasništvu useljivu kuću ili stan, kao ni članovi njenog porodičnog domaćinstva;

- osoba koja ne koristi odgovarajući stan na osnovu ugovora o zakupu stana sklopljenog na neodređeno vrijeme, kao ni članovi njenog porodičnog domaćinstva;

- osoba čija ukupna prosječna mjesečna primanja po članu porodičnog domaćinstva ne prelaze 80% prosječno mjesečno isplaćene plate u Federaciji BiH u prethodnoj godini.

Član 9.

Pravo na dodjelu stana u zakup ne može ostvariti osoba koja se dovela u nepovoljan stambeni status prodajom ili poklonom porodične kuće ili stana.

c) Postupak davanja stana u zakup

Član 10.

Stanovi na kojima Općina Goražde ima pravo raspolaganja daju se u zakup:

A) osobama iz člana 7. stav 1. alineja 1. na osnovu konačne liste reda prvenstva koju nakon provedenog javnog oglasa, utvrđuje Komisija za provođenje procedure davanja stanova u zakup (u daljem tekstu: Komisija);

Komisiju imenuje načelnik Općine na period od 2 godine.

B) osobama iz člana 7. stav 1. alineja 2. i 3. ove Odluke stan se daje u zakup izvan liste reda prvenstva, a na temelju obrazloženog prijedloga ovlaštene komisije.

A 1. Javni oglas

Član 11.

Postupak za davanje stana u zakup pokreće se podnošenjem zahtjeva Komisiji na osnovu objavljenog javnog oglasa.

Javni oglas za davanje stanova u zakup oglašava načelnik Općine svake četiri godine, a po potrebi može i ranije.

Javni oglas se objavljuje na oglasnoj ploči Općine Goražde, kao i putem lokalnih medija.

Rok za podnošenje zahtjeva je 15 dana, računajući od dana objave javnog oglasa na oglasnoj ploči Općine Goražde.

Član 12.

Javni oglas obavezno sadrži:

- vrijeme trajanja oglasa;
- naziv i adresu komisije kojoj se zahtjev podnosi;
- uvjete za dodjelu stana u zakup, te kriterije na osnovu kojih će se utvrditi lista reda prvenstva;
- dokaze o ispunjavanju uvjeta za dodjelu stana u zakup;
- mjesto oglašavanja liste reda prvenstva.

Član 13.

Ispunjavanje uvjeta za davanje stana u zakup podnosilac zahtjeva dokazuje javnim ispravama, ako ovom Odlukom nije određeno drugačije.

Član 14.

Zahtjeve podnesene izvan roka utvrđenog u oglasu i one uz koje nisu priloženi svi dokazi Komisija će zaključkom odbaciti kao neblagovremene, odnosno

nepotpune.

Zahtjeve osoba koje ne ispunjavaju uvjete iz člana 7. i 8. ove Odluke Komisija će odbiti kao neosnovane.

Na zaključak o odbacivanju, odnosno odbijanju zahtjeva za dodjelu stana u zakup može se uložiti prigovor načelniku Općine Goražde u roku od 8 dana od dana dostave zaključka.

A 2. Kriteriji za utvrđivanje liste reda prvenstva

Član 15.

Kriteriji za utvrđivanje liste reda prvenstva su:

- stambeni status,
- socijalno-zdravstveni status,
- vrijeme prebivanja na području općine Goražde,
- pripadnost oružanim snagama BiH (AR BiH, HVO, MUP),
- članovi porodice poginulih pripadnika oružanih snaga BiH,
- ratni vojni invalidi.

Kriteriji iz stava 1. ovoga člana vrednuju se i izražavaju u bodovima.

a) Stambeni status

Član 16.

Prema stambenom statusu podnosioca zahtjeva utvrđuju se bodovi:

1. podstanar	40
2. osobi koja stanuje kod roditelja ili kod supružnikovih roditelja, a stan ne odgovara potrebama porodičnog domaćinstva	30
3. osobama koje koriste privremeni ili alternativni smještaj ili im je utvrđeno pravo na privremeni smještaj, a stan koji koriste ne odgovara potrebama porodičnog domaćinstva s obzirom na uvjetnost i broj članova porodičnog domaćinstva	25

Podnosilac zahtjeva dokazuje stambeni status ugovorom o zakupu (podstanarstvu) ili ovjerenom izjavom podnosioca zahtjeva i dva svjedoka o stambenom statusu ukoliko stanuje kod roditelja ili kod supružnikovih roditelja ili uvjerenjem nadležnog stambenog organa općine o korištenju privremenog ili alternativnog smještaja.

b) Socijalno-zdravstveni status

Član 17.

Socijalno-zdravstveni status podnosioca zahtjeva utvrđuje se prema visini primanja, broju članova porodičnog domaćinstva, nesposobnosti za rad te nesposobnosti za samostalan život.

Član 18.

Prema ukupnim prosječnim mjesečnim primanjima po članu porodičnog domaćinstva, ostvarenim u prethodnoj godini, podnosiocu zahtjeva utvrđuju se bodovi:

a) korisnicima stalne novčane pomoći	20
b) do 25% prosječno mjesečno isplaćene plate BPK Goražde u prethodnoj godini	12
c) od 26 do 50 % mjesečno isplaćene plate BPK Goražde u prethodnoj godini	8
d) od 51 do 75 % mjesečno isplaćene plate BPK Goražde u prethodnoj godini	4

Ukupnim primanjima porodičnog domaćinstva smatra se ukupan prihod domaćinstva ostvaren u godini koja prethodi raspisivanju javnog oglasa (sve vrste prihoda svih članova porodičnog domaćinstva).

Član 19.

Za svakog člana porodičnog domaćinstva, uključujući i podnosioca zahtjeva, utvrđuju se po dva (2) boda.

Za svakog maloljetnog člana porodičnog domaćinstva podnosiocu zahtjeva pripada još po tri (3) boda.

Članom porodičnog domaćinstva podnosioca zahtjeva smatraju se: bračni drug, vanbračni supružnik, djeca (rođena u braku ili van braka, pastorčad), bračni drugovi djece, roditelji bračnih drugova (otac, majka, očug, maćeha, usvojitelj), braća i sestre, unučad bez roditelja, kao i osobe koje je podnosilac zahtjeva dužan izdržavati, a koje zajedno sa njim trajno stanuju i žive u zajednici više od 10 godina ili više od 5 godina na temelju ugovora o doživotnom izdržavanju.

Vanbračna zajednica u kojoj nema zajedničke djece dokazuje se pravosnažnom odlukom donesenom u vanparničnom sudskom postupku.

Član 20.

Po osnovu trajne nesposobnosti za rad podnosioca zahtjeva ili punoljetnog člana porodičnog domaćinstva, utvrđene pravosnažnim rješenjem Fonda za PIO/MIO, podnosiocu zahtjeva pripada pet (5) bodova za svakog člana.

Po osnovi trajne nesposobnosti za samostalan život podnosioca zahtjeva ili člana porodičnog domaćinstva, utvrđene pravosnažnim rješenjem nadležnog Centra za socijalni rad, podnosiocu zahtjeva pripada pet (5) bodova za svakog člana.

c) Vrijeme prebivanja podnosioca zahtjeva na području općine Goražde

Član 21.

Za svaku godinu neprekidnog prebivanja na području općine Goražde podnosiocu zahtjeva pripada po jedan

(1) bod.

Ukupan broj bodova ostvaren prema mjerilu iz stavka 1. ovoga članka ne može biti veći od 30 bodova.

d) Pripadnost oružanim snagama BiH (AR BiH, HVO, MUP)

Član 22.

Podnosiocu zahtjeva po osnovu učešća u oružanim snagama (Armija BiH, HVO i MUP) za svaki mjesec učešća pripada 0,5 bodova, a u periodu od 04.05.1992. do 02.12.1995. godine.

Vrijeme provedeno oružanim snagama preko 15 dana računa se kao puni mjesec.

e) Članovi porodice poginulih pripadnika oružanih snaga BiH

Član 23.

Porodici poginulog pripadnika oružanih snaga BiH po ovom kriteriju pripada 30 bodova.

f) Ratni vojni invalidi

Član 24.

Po osnovu stepena invalidnosti podnosiocu zahtjeva koji je ratni vojni invalid pripadaju sljedeći bodovi:

I grupa (RVI 100%)	23 bodova
II grupa (RVI 100%)	20 bodova
III grupa (RVI 90%)	18 bodova
IV grupa (RVI 80%)	16 bodova
V grupa (RVI 70%)	14 bodova
VI grupa (RVI 60%)	12 bodova
VII grupa (RVI 50%)	10 bodova
VIII grupa (RVI 40%)	8 bodova
IX grupa (RVI 30%)	6 bodova
X grupa (RVI 20%)	4 bodova.

A 3. Utvrđivanje liste reda prvenstva

Član 25.

Za bodovanje prema kriterijima iz ove Odluke uzet će se u obzir okolnosti i činjenice koje postoje onog dana koji je u oglasu određen kao zadnji dan za podnošenje zahtjeva.

Član 26.

Nakon isteka roka za podnošenje zahtjeva, Komisija će razmotriti svaki pojedini zahtjev i na temelju utvrđenog činjeničnog stanja, u skladu sa kriterijima iz ove Odluke, utvrditi broj bodova prema svakom pojedinom kriteriju te ukupan broj bodova.

Član 27.

Na osnovu ukupnog broja bodova Komisija utvrđuje prijedlog liste reda prvenstva.

Ako dva ili više podnosioca zahtjeva ostvare jednak broj bodova, prednost na listi reda prvenstva ima onaj podnosilac zahtjeva koji ima najviše bodova prema sljedećim kriterijima:

- vrijeme prebivanja na području općine Goražde;
- vrijeme provedeno u oružanim snagama;
- uvjeti stanovanja.

Član 28.

Lista reda prvenstva sadrži:

- redni broj;
- ime, prezime i adresu podnosioca zahtjeva;
- broj bodova prema svakoj pojedinoj osnovi i kriteriju, te ukupan broj bodova;
- datum utvrđivanja liste;
- datum objavljivanja liste;
- upustvo o pravu na prigovor.

Član 29.

Prijedlog liste reda prvenstva objavljuje se na oglasnoj ploči Općine Goražde u trajanju od 15 dana.

Član 30.

Na listu reda prvenstva svaki podnosilac zahtjeva može podnijeti pismeni prigovor u roku od 15 dana od dana objavljivanja liste na oglasnoj ploči.

Prigovor se podnosi načelniku Općine putem Komisije. Ako niko od podnosilaca zahtjeva ne podnese prigovor u ostavljenom roku, prijedlog liste postaje konačna lista što potvrđuje na listi načelnik Općine.

Član 31.

Konačnu listu reda prvenstva za davanje stanova u zakup po podnesenim prigovorima utvrđuje načelnik Općine Goražde.

Konačna lista reda prvenstva važi do utvrđivanja nove konačne liste reda prvenstva za davanje stanova u zakup.

Član 32.

Prije odlučivanja o davanju stana u zakup na osnovu konačne liste reda prvenstva obaviti će se uviđaj, odnosno dodatna provjera dokaza o ispunjavanju uvjeta propisanih Odlukom.

Ako se utvrdi da podnosilac zahtjeva ne ispunjava uvjete, odnosno da je u međuvremenu došlo do promjene stambenog statusa u smislu člana 7. ove Odluke, ili se utvrdi da nije dao istinite podatke, a koji su utjecali na ostvarivanje prava na dodjelu stana u zakup, taj će podnosilac biti brisan s liste reda prvenstva.

S liste reda prvenstva brisat će se podnosilac zahtjeva

koji odbije ponuđeni odgovarajući stan.

Brisanje podnosioca zahtjeva sa liste prvenstva za davanje u zakup stana vrši načelnik Općine zaključkom koji je konačan.

Član 33.

Odgovarajućim stanom, s obzirom na broj članova porodičnog domaćinstva, smatra se:

- za porodično domaćinstvo do tri (3) člana - garsonjera i jednosoban stan;
- za porodično domaćinstvo do šest (6) članova - dvosoban stan;
- za porodično domaćinstvo sa više od šest (6) članova - trosoban ili veći stan.

B Komisija za davanje stanova u zakup

Član 34.

Za davanje stanova u zakup izvan liste reda prvenstva osobama iz člana 7. alineja 2. i 3. ove Odluke, Općinsko vijeće imenuje posebnu komisiju za davanje stanova u zakup.

Član 35.

Komisija iz predhodnog člana ima tri (3) člana od kojih se predsjednik imenuje na prijedlog načelnika, a dva (2) člana na prijedlog Općinskog vijeća. Komisija se imenuje na mandatni period vijećnika u Općinskom vijeću. Komisija razmatra zahtjeve osoba iz člana 7. stav 1. alineje 2. i 3. ove Odluke te Općinskom vijeću daje mišljenje i prijedloge za davanje stana u zakup. Na osnovu mišljenja Općinsko vijeće donosi odluku o pravu na zakup stana.

Član 36.

Na rad Komisije primjenjuju se odredbe Poslovnika Općinskog vijeća Općine Goražde koje se odnose na radna tijela.

C 1. Akt o davanju stana u zakup

Član 37.

O davanju stana u zakup u skladu sa konačnom listom ili odlukom Općinskog vijeća, načelnik Općine donosi zaključak.

Na zaključak se, radi njegova preispitivanja, može uložiti prigovor Općinskom vijeću u roku od 8 dana od dana dostave.

U povodu preispitivanja zaključka Općinsko vijeće ga može izmijeniti, potvrditi ili uloženi prigovor odbiti kao neosnovan.

C 2. Ugovor o zakupu stana

Član 38.

Na osnovu zaključka iz člana 39. ove Odluke sklapa se ugovor o zakupu stana. Ugovor o zakupu stana potpisuje načelnik Općine i zakupac.

Član 39.

Trenutni korisnici stanova koji ispunjavaju mjerila i kriterije za dodjelu stana u zakup iz ove Odluke i nalaze se na listi prioriteta nastaviti će sa korištenjem istih stanova i sa njima će se zaključiti ugovori o zakupu predmetnih stanova.

Član 40.

Na pojedinačna prava i obaveze zakupodavca i zakupoprimca odgovarajuće će se primjenjivati odredbe Kantonalnog zakona o zakupu stana ("Službene novine Bosansko-podrinjskog kantona Goražde", br. 7/2004).

Član 41.

Stanovi iz člana 13. Zakona o prestanku primjene Zakona o napuštenim stanovima, davit će se u zakup isključivo licima koja se nađu na listi prioriteta za davanje u zakup stanova, koji mogu u roku od 3 mjeseca od dana zaključenja ugovora o zakupu stana podnijeti zahtjev za otkup stana u skladu sa Zakonom o vraćanju, dodjeli i prodaji stanova, pod uvjetom da na teritoriji BiH nemaju u vlasništvu drugu stambenu jedinicu ili da imaju pravo na rekonstrukciju u toku ratnih dejstava uništene ili oštećene imovine.

Član 42.

Sve poslove evidencije stanova, administrativne i pravne poslove u vezi upravljanja i raspolaganja stanovima obavlja nadležna općinska služba.

IV. PRELAZNE I ZAVRŠNE ODREDBE

Član 43.

U roku od 60 dana od dana donošenja ove Odluke nadležna služba će sačiniti evidenciju stanova prema podacima iz člana 3. stav 3. ove Odluke.

Član 44.

Ova Odluka stupa na snagu osmog dana od dana objavljivanja u "Službenim novinama Općine Goražde".

Broj: 01-02-1-4484
Goražde, 30.08.2012.godine

ZAMJENIK PREDSJEDAVAJUĆEG VIJEĆA
Aida Obuća, dipl.prav.

0910

Na osnovu odredaba člana 13. Zakona o principima lokalne samouprave u Federaciji Bosne i Hercegovine ("Službene novine FBiH" broj: 49/06) i članova 18, 77. i 84. Statuta Općine Goražde ("Službene novine Bosansko-podrinjskog kantona Goražde" broj: 13/07), Općinsko vijeće općine Goražde, na 43. redovnoj sjednici, održanoj dana 30.08.2012. godine, d o n o s i:

O D L U K U

o prihvatanju ponude Kiraz Adise za kupovinu zemljišta i objekta

Član 1.

Prihvata se ponuda Kiraz Adise od 15.08.2012. godine, zavedena pod brojem: 07-1-31-9-4193/12, kojom Općini Goražde nudi kupovinu zemljišta i objekta, koje se nalazi u Faočićima-Ilovača Općina Goražde, po ponuđenoj ukupnoj cijeni u iznosu od 6.000,00KM, radi izgradnje poslovne zgrade za potrebe ambulante u Goraždu u mjestu Faočići Općina Goražde.

Član 2.

Odobrava se kupovina u korist Općine Goražde zemljišta iz člana 1. ove Odluke, koje je u katastarskom operatu premjera i katastra zemljišta označeno kao:

- k.č. 657 zvana "Rijeka", po kulturi dvorište i privredna zgrada, u ukupnoj površini od 359 m², koja je upisana u p.l. br. 95/04 k.o. Kreča, na ime Kiraz (Durma) Adisa r. Mršo sa 1/1 dijela posijeda po cijeni u ukupnom iznosu od 6.000,00 KM (šest hiljada konvertibilnih maraka).

Član 3.

Novčana sredstva iz člana 2. ove Odluke obezbjedit će se iz Budžeta Općine Goražde za 2012. godinu, izgradnja poslovne zgrade za potrebe ambulante u mjestu Faočići Općina Goražde.

Član 4.

Ovlašćuje se načelnik općine Goražde da zaključi kupoprodajni ugovor sa prodavcem, s tim što će Općina Goražde snositi sve troškove prenosa prava vlasništva.

Član 5.

Ova Odluka stupa na snagu osmog dana od dana objavljivanja u "Službenim novinama općine Goražde".

Broj:01-02-1-4483
Goražde, 30.08. 2012. godine

ZAMJENIK PREDSJEDAVAJUĆEG VIJEĆA
Aida Obuća, dipl.prav.

0911

Na osnovu člana 16. stav 1. tačka 1. i stava 2. tog člana, a u vezi sa članom 165. Zakona o zaštiti od požara i vatrogastvu („Službene novine Federacije BiH“, br: 65/09) i članova 18 i 84. Statuta Općine Goražde („Službene novine Bosansko-podrinjskog kantona Goražde“, broj:13/07), Općinsko vijeće Općine Goražde, na 43. redovnoj sjednici, održanoj 30.08.2012.godine, donosi:

ODLUKU

o organizovanju i funkcionisanju zaštite od požara i vatrogastva

I OPĆE ODREDBE

Član 1.

Ovom se Odlukom uređuje organizacija i funkcionisanje zaštite od požara i vatrogastva na području općine Goražde, utvrđuje nadležnost općinskog vijeća, općinskog načelnika, općinskih službi za upravu i općinske službe za civilnu zaštitu i mjesne zajednice, obaveze drugih institucija, pravnih i fizičkih lica i građana u planiranju, organizovanju i provođenju zaštite od požara, organizovanje vatrogasne djelatnosti, kao i finansiranje zaštite od požara i vatrogastva u općini Goražde.

Član 2.

Općina Goražde kao jedinica lokalne samouprave, osnovni je nosilac organiziranja i provođenja zaštite od požara i vatrogastva na području općine.

Zaštita od požara i vatrogastvo iz stava 1. ovog člana, organizuje se i provodi na način utvrđen Zakonom o zaštiti od požara i vatrogastvu („Službene novine Federacije BiH“, br: 65/09, u daljem tekstu: Zakon), propisima Kantona iz ove oblasti i ovom Odlukom, u okviru jedinstvenog sistema zaštite i spašavanja ljudi i materijalnih dobara od prirodnih i drugih nesreća, koji je uređen Zakonom o zaštiti i spašavanju ljudi i materijalnih dobara od prirodnih i drugih nesreća („Službene novine Federacije BiH“, br. 39/03, 22/06, 43/10, u daljem tekstu: Zakon o zaštiti i spašavanju).

Član 3.

Vatrogastvo je obavezna javna služba čija je osnovna djelatnost zaštita i spašavanje ljudi i materijalnih dobara od požara, a trajno i neometano djelovanje ove službe osigurava općina Goražde, na način predviđen Zakonom.

Vatrogasna djelatnost je stručna i humanitarna djelatnost, koja je u funkciji zaštite osnovnih ljudskih prava na život i materijalna dobra, zbog čega predstavlja poseban javni interes za općinu Goražde.

II NADLEŽNOSTI ORGANA VLASTI OPĆINE GORAŽDE

Član 4.

Općinsko vijeće Općine Goražde u oblasti zaštite od požara i vatrogastva:

- 1) Utvrđuje Procjenu ugroženosti od požara za područje općine Goražde, u skladu sa Metodologijom za izradu procjene ugroženosti od požara („Službene novine Federacije BiH“, broj: 8/11);
- 2) Utvrđuje program razvoja zaštite od požara i vatrogastva općine Goražde, u okviru Programa razvoja zaštite i spašavanja ljudi i materijalnih dobara od prirodnih i drugih nesreća općine Goražde;
- 3) Donosi plan zaštite od požara općine Goražde u skladu sa Uredbom o sadržaju i načinu izrade i sadržaju planova zaštite i spašavanja od prirodnih i drugih nesreća i planova zaštite od požara („Službene novine Federacije BiH“, broj 8/11) i osigurava realizaciju tog plana;
- 4) Razmatra stanje zaštite od požara i vatrogastva na području općine i utvrđuje odgovarajuće mjere za dogradnju i efikasno funkcionisanje vatrogastva.
- 5) Donosi odluku o osnivanju Profesionalne vatrogasne jedinice općine (u daljem tekstu: PVJ);
- 6) Donosi odluku o organizaciji i radu dimnjačarske djelatnosti, rokove čišćenja dimnjaka, uvjete za vršenje dimnjačarske službe te druga pitanja od značaja za obavljanje dimnjačarske djelatnosti te obavlja nadzor nad radom dimnjačarske službe;
- 7) Planira i osigurava finansijska sredstva u Budžetu Općine za finansiranje potreba zaštite od požara i vatrogastva iz nadležnosti Općine.

Član 5.

Općinski načelnik, u oblasti zaštite od požara i vatrogastva, na prijedlog Službe za civilnu zaštitu i mjesne zajednice:

- 1) Predlaže Općinskom vijeću donošenje plana zaštite od požara iz člana 4. stav 1. tačka 3) ove Odluke;
- 2) Predlaže Općinskom vijeću donošenje odluke o osnivanju PVJ iz člana 4. stav 1. tačka 5) ove Odluke;

3) Utvrđuje ličnu i materijalnu formaciju PVJ iz tačke 2) ovog člana;

4) Dobrovoljno vatrogasno društvo ili dobrovoljnu vatrogasnu jedinicu u tom

Društvu proglašava službom za zaštitu od požara općine Goražde, na način predviđen podzakonskim propisom, donesenim na osnovu Zakona o zaštiti i spašavanju, a koji se odnosi na formiranje službi zaštite i spašavanja ljudi i materijalnih dobara od prirodnih i drugih nesreća (ova tačka se utvrđuje u ovoj Odluci, u zavisnosti od toga da li u općini ima ili nema formirano dobrovoljno vatrogasno društvo ili dobrovoljna vatrogasna jedinica, odnosno potreba općine za formiranje ove službe, što se utvrđuje u Procjeni ugroženosti od požara);

5) Utvrđuje uvjete, prioritete i način korištenja finansijskih sredstava prikupljenih na

Posebnom jedinstvenom transakcijskom računu iz člana 22. ove Odluke, za nabavku vatrogasne opreme, tehničkih i drugih sredstava, stručno obučavanje i osposobljavanje vatrogasaca, održavanje opreme i vatrogasnih sredstava te investiciju izgradnju i opremanje objekata za potrebe vatrogasne jedinice;

6) Donosi odluku o izmjenama i dopunama Pravilnika o unutrašnjoj organizaciji

općinskih službi za upravu i drugih službi u Općini Goražde, uz saglasnost Općinskog vijeća, za potrebe realizacije aktivnosti iz člana 18. ove Odluke.

Član 6.

Općinske službe za upravu, u oblasti zaštite od požara i vatrogastva, u okviru svog djelokruga rada, organizuju i provode zaštitu od požara, radi zaštite ljudstva i materijalnih dobara koja koriste u svom radu.

Pored poslova iz stava 1. ovog člana, obavljaju i sljedeće poslove zaštite od požara:

1) Učestvuju u izradi Procjene ugroženosti od požara i Programa razvoja zaštite od požara i vatrogastva iz člana 4. stav 1. tačke 1) i 2) ove Odluke, iz oblasti za koju su osnovani;

2) U okviru svoje redovne djelatnosti realizuju zadatke u oblasti zaštite od požara koji su utvrđeni u dokumentima iz tačke 1) ovog člana, koji se odnose na oblast za koju su osnovani;

3) Vršer i druge poslove zaštite od požara i vatrogastva, u skladu sa Zakonom i drugim propisima, kojim je uređena ova oblast.

Član 7.

Za obavljanje poslova iz oblasti zaštite od požara i vatrogastva, u Službi civilne

zaštite Općine Goražde osniva se organizacijska jedinica za zaštitu od požara i vatrogastvo.

Član 8.

Služba za civilnu zaštitu i mjesne zajednice, kao osnovni stručni organ u općini Goražde za oblast zaštite od požara i vatrogastva, obavlja sljedeće poslove:

- 1) Preuzima odgovarajuće mjere i aktivnosti na organizaciji i provođenju zaštite od požara i vatrogastva na području općine;
- 2) Obavlja stručne i druge poslove koji se odnose na organizovanje PVJ općine i predlaže i poduzima mjere na osiguranju kadrovskih, materijalnih, tehničkih i drugih uvjeta, potrebnih za efikasan rad i funkcioniranje te jedinice i u tim pitanjima ostvaruje saradnju sa kantonalnom upravom civilne zaštite;
- 3) Definiše i predlaže pitanja koja se odnose na razvoj zaštite od požara i vatrogastva u okviru Programa razvoja zaštite i spašavanja ljudi i materijalnih dobara od prirodnih i drugih nesreća općine Goražde, a što se vrši u saradnji sa ostalim službama za upravu Općine;
- 4) Nosilac je aktivnosti na izradi Plana zaštite od požara iz člana 4. stav 1. tačka 3) ove Odluke i osigurava njegovu realizaciju, uz učešće službi za upravu Općine i drugih institucija i organa;
- 5) Predlaže ličnu i materijalnu formaciju PVJ općine;
- 6) Planira i osigurava provođenje obuke i stručno osposobljavanje i usavršavanje pripadnika PVJ općine i drugih lica koja se bave poslovima vatrogastva;
- 7) Pruža stručnu i drugu pomoć dobrovoljnim vatrogasnim društvima, radi uspješnog obavljanja poslova zaštite od požara i vatrogastva iz njihove nadležnosti od značaja za vatrogastvo, a posebne aktivnosti provodi kod onih vatrogasnih društava u kojima je osnovana dobrovoljna vatrogasna jedinica radi osposobljavanja te jedinice za ekikasno učešće u gašenju požara na području općine (ova tačka se utvrđuje u ovoj Odluci, u zavisnosti od toga da li u općini ima ili nema formirano dobrovoljno vatrogasno društvo ili dobrovoljnu vatrogasnu jedinicu);
- 8) Ostvaruje saradnju sa pravnim licima u kojima su osnovane vatrogasne jedinice radi osposobljavanja tih jedinica za efikasno gašenje požara i mogućeg učešća tih jedinica na gašenju požara van objekata i prostora pravnog lica na području općine;
- 9) Ostvaruje saradnju sa službama civilne zaštite susjednih općina u pitanjima od zajedničkog interesa za zaštitu od požara i vatrogastvo;

10) U okviru Operativnog centra civilne zaštite, organizuje funkcionalni dio informacionog sistema za zaštitu od požara i vatrogastvo;

11) Planira finansijska sredstva u Budžetu Općine za finansiranje potreba zaštite od požara i vatrogastva iz nadležnosti Općine,

12) Vršiti i druge poslove iz oblasti zaštite od požara i vatrogastva, koji su Zakonom, propisima Kantona te odlukom Općinskog vijeća, stavljeni u nadležnost Službe civilne zaštite i mjesnih zajednica općine.

III DUŽNOSTI OPĆINSKIH SLUŽBI ZA UPRAVU, DRUGIH INSTITUCIJA, PRAVNIH I FIZIČKIH LICA I GRAĐANA U OBLASTI ZAŠTITE OD POŽARA

Član 9.

Organizacija i funkcionisanje zaštite od požara u općini Goražde utvrđuje se u Planu zaštite od požara iz člana 4. stav 1. tačka 3) ove Odluke.

Član 10.

Zaštitu od požara dužne su da organizuju i provode općinske službe za upravu i druge institucije, pravna i fizička lica te građani, u svim građevinama i prostorima u kojima borave i rade, uključujući i šume, šumska i poljoprivredna zemljišta, kao i ostale prirodne resurse na području općine Goražde.

Vlasnici ili korisnici građevina i prostora, upravitelji stambenih objekata, kao i vlasnici i korisnici šuma, šumskog i poljoprivrednog zemljišta iz stava 1. ovog člana, odgovorni su za zaštitu od požara u tim građevinama i prostorima.

Član 11.

Organi uprave i druge institucije, pravna i fizička lica, građani iz člana 10. stav. 1. ove Odluke, dužni su izvršavati zadatke, odnosno mjere zaštite od požara, utvrđene u Planu zaštite od požara općine Goražde, koji se na njih odnose.

Plan zaštite od požara, za vlastite potrebe, obavezno donose i općinske službe za upravu i druge institucije i pravna lica koji budu određeni u Planu zaštite od požara iz stava 1. ovog člana.

Član 12.

Pravna lica, organi uprave i druge institucije na području općine Goražde, dužni su donijeti opći akt - pravilnik zaštite od požara, kojim će utvrditi cjelokupnu organizaciju zaštite od požara i način njenog

funkcionisanja u građevinama i prostorima koje to pravno lice, organ uprave ili institucija koristi u svom radu, u skladu sa vrstom djelatnosti koju obavljaju i procesom rada.

Član 13.

Pravna lica, državni organi i druge institucije, dužni su upoznati sva zaposlena lica sa općim aktom iz člana 12. ove Odluke, kao i provoditi stručnu obuku i osposobljavanje za zaštitu od požara, na način predviđen članom 128. Zakona.

Član 14.

Pravna lica, općinski organi uprave, druge institucije i građani, dužni su Operativnom centru civilne zaštite, iz člana 8. stav 1. tačka 10) ove Odluke, dostavljati podatke o događajima koji se odnose na pojave požara i eksplozija, širenje požara, uzrocima nastanka požara, objektima i prostoru koji je ugrožen požarom, Vatrogasnim jedinicama i drugim snagama angažovanim na gašenju požara, nastalim posljedicama i drugim podacima od značaja za pojavu požara ili eksplozije na određenom prostoru.

Član 15.

Javno komunalno preduzeće (JKP 6. mart), koje upravlja vodovodnom i hidrantskom mrežom na području općine, dužno je pri izgradnji, rekonstrukciji i korištenju ovih mreža osigurati propisani protočni kapacitet i pritisak vode u hidrantskoj mreži za potrebe gašenja požara.

Javno komunalno preduzeće iz stava 1. ovog člana, dužno je stalno održavati u ispravnom stanju hidrantsku mrežu na području općine, o čemu treba voditi odgovarajuće evidencije i o tome izvještavati PVJ općine Goražde.

Član 16.

Vlasnici i korisnici građevina i prostora i upravitelji stambenih objekata, u čijim građevinama i objektima je izvedena unutrašnja i vanjska hidrantska mreža, drugi uređaji i oprema za gašenje požara, kao i sistemi aktivne zaštite od požara, dužni su te uređaje, opremu i sisteme stalno održavati u ispravnom stanju, redovno vršiti njihovu kontrolu ispravnosti, o čemu moraju voditi odgovarajuću evidenciju.

IV ORGANIZOVANJE VATROGASNE DJELATNOSTI

Član 17.

Na osnovu pokazatelja o potrebnom broju vatrogasaca utvrđenih u Procjeni ugroženosti od požara općine Goražde, u Planu zaštite od požara općine Goražde, utvrđuje se ukupan broj vatrogasaca

koji je potreban za efikasno djelovanje PVJ na području općine Goražde.

Član 18.

Zaposlenici koji su na dan donošenja Zakona bili zaposleni u Profesionalnoj vatrogasnoj jedinici općine Goražde od dana prijema ove Odluke postaju zaposlenici Službe za civilnu zaštitu i mjesne zajednice općine Goražde, u okviru organa državne službe općine Goražde, na način predviđen Zakonom.

Postojeća Profesionalna vatrogasna jedinica Općine Goražde gubi svoj pravni subjektivitet, a objekti, oprema, tehnička i druga sredstva kojima ista raspolaže, preuzima nadležni organ iz stava 1. ovog člana.

Član 19.

Područje djelovanja PVJ iz člana 8. ove Odluke je područje općine Goražde, s tim da se po naredbi Službe za civilnu zaštitu i mjesne zajednice, odnosno općinskog Štaba civilne zaštite, ova jedinica može uputiti i izvan područja djelovanja, što se vrši u uvjetima utvrđenim članovima 94. i 96. Zakona.

Poslovi PVJ općine Goražde utvrđeni su članom 68. Zakona.

V FINANSIRANJE ZAŠTITE OD POŽARA I VATROGASTVA

Član 20.

Finansijska sredstva za provođenje poslova i zadataka iz oblasti zaštite od požara i vatrogastva na području općine Goražde planiraju se i osiguravaju u Budžetu Općine, na prijedlog Službe za civilnu zaštitu i mjesne zajednice.

Član 21.

Potrebna finansijska sredstva iz člana 20. ove Odluke planiraju se na osnovu poslova i zadataka koji su za oblast zaštite od požara i vatrogastva utvrđeni u programu rada općinskog načelnika, službe za civilnu zaštitu i mjesne zajednice i drugih općinskih službi za upravu, te na osnovu poslova i zadataka utvrđenih u dokumentima iz člana 4. stav.1. tač.1) i 3) ove Odluke, koji predstavljaju osnovna dokumenta za organizaciju i funkcionisanje zaštite od požara i vatrogastva na području općine.

Član 22.

Služba za finansije, trezor i privredu Općine Goražde će otvoriti poseban jedinstveni transakcijski račun za potrebe prikupljanja sredstava posebne naknade, koja će izdvajati društva za osiguranje i druga pravna lica koja se bave osiguranjem imovine i koja vrše registraciju vozila, kao i druga sredstva koja se

obezbjeduju u skladu sa Zakonom, za finansiranje vatrogasne djelatnosti u općini Goražde.

VI PRELAZNE I ZAVRŠNE ODREDBE

Član 23.

U cilju praćenja izvršenja Plana zaštite od požara općine Goražde, Općinsko vijeće svake godine do kraja februara, razmatra i ocjenjuje njegovu realizaciju i vrši odgovarajuće izmjene sa novonastalim promjenama, koje su važne za zaštitu od požara, kao što su urbanističke i građevinske promjene, kao i promjene namjene građevina i slično i utvrđuje mjere za njegovu potpunu realizaciju, a posebno mjere koje se odnose na osiguravanje neophodnih finansijskih sredstava za realizaciju planiranih zadataka.

Član 24.

Ovlašćuje se općinski načelnik da svojim posebnim odlukama uredi pitanja organizovanja, planiranja i provođenja mjera zaštite od požara na otvorenim prostorima (šume, šumsko i poljoprivredno zemljište, drugi prirodni resursi), kao i druga pitanja iz ove oblasti, koja ovom Odlukom nisu obuhvaćena.

Član 25.

U slučaju postupanja protivno odredbama ove Odluke, primjenit će se kaznene odredbe utvrđene Zakonom.

Član 26.

Donošenjem ove Odluke prestaje da važi odluka br:01-02-3555 od 26.07.2006. godine.

Član 27.

Odluka stupa na snagu osmog dana od dana objavljivanja u „Službenim novinama Općine Goražde“.

Broj:01-02-1-4482
Goražde:30.08.2012.godine

ZAMJENIK PRESJEDAVALAČE VIJEĆA
Aida Obuća, dipl.prav.

0912

Na osnovu člana 18. i člana 84. Statuta Općine Goražde („Službene novine Bosansko-podrinjskog kantona Goražde“, broj: 13/07) i člana 29. Odluke o utvrđivanju javnih priznanja Općine Goražde („Službene novine Općine Goražde“, broj: 5/10), Općinsko vijeće Općine Goražde, na 43. redovnoj sjednici, održanoj dana 30.08.2012.godine, donosi:

ODLUKU

o dodjeli javnih priznanja Općine Goražde

Član 1.

Općina Goražde u 2012. godini dodjeljuje javno priznanje «POČASNI GRAĐANIN OPĆINE GORAŽDE»

gosp. ŠAKIRU YUCE KARAMAN – Turska, za izuzetan doprinos u povećanju ugleda Općine Goražde u zemlji i inostranstvu te kulturno-obrazovni razvoj.

Član 2.

Dodjela navedenih priznanja obaviti će se na Dan Općine Goražde, 18. septembra 2012. godine.

Član 3.

Ova Odluka stupa na snagu osam dana od dana objavljivanja u „Službenim novinama Općine Goražde“.

Broj: 01-02-1-4479
Goražde, 30.08.2012. godine
ZAMJENIK PRESJEDAVALAČE VIJEĆA
Aida Obuća, dipl.prav.

0913

Na osnovu člana 18. i člana 84. Statuta Općine Goražde („Službene novine Bosansko-podrinjskog kantona Goražde“, broj: 13/07) i člana 29. Odluke o utvrđivanju javnih priznanja Općine Goražde („Službene novine Općine Goražde“, broj: 5/10), Općinsko vijeće Općine Goražde, na 43.redovnoj sjednici, održanoj dana 30.08.2012.godine, donosi:

ODLUKU

o dodjeli javnih priznanja Općine Goražde

Član 1.

Općina Goražde u 2012. godini dodjeljuje javno priznanje «ZLATNA PLAKETA OPĆINE GORAŽDE»

gosp. JUSUFU HUBJERU za izuzetan doprinos razvoju privrede i ugleda Općine Goražde u zemlji i inostranstvu.

Član 2.

Dodjela navedenih priznanja obaviti će se na Dan Općine Goražde, 18. septembra 2012. godine.

Član 3.

Ova Odluka stupa na snagu osam dana od dana objavljivanja u „Službenim novinama Općine Goražde“.

Broj: 01-02-1-4480
Goražde, 30.08.2012. godine
ZAMJENIK PRESJEDAVALAČKOG VIJEĆA
Aida Obuća, dipl.prav.

0914

Na osnovu člana 18. i člana 84. Statuta Općine Goražde („Službene novine Bosansko-podrinjskog kantona Goražde“, broj: 13/07) i člana 29. Odluke o utvrđivanju javnih priznanja Općine Goražde („Službene novine Općine Goražde“, broj: 5/10), Općinsko vijeće Općine Goražde, na 43. redovnoj sjednici, održanoj dana 30.08.2012.godine, donosi:

ODLUKU

o dodjeli javnih priznanja Općine Goražde

Član 1.

Općina Goražde u 2012. godini dodjeljuje javno priznanje «SREBRENA PLAKETA OPĆINE GORAŽDE»

gosp. HUSNU HRAPO za izuzetan doprinos u promovisanju ugleda Općine Goražde i očuvanje historijskih i kulturnih vrijednosti.

Član 2.

Dodjela navedenih priznanja obaviti će se na Dan Općine Goražde, 18. septembra 2012. godine.

Član 3.

Ova Odluka stupa na snagu osam dana od dana objavljivanja u „Službenim novinama Općine Goražde“.

Broj: 01-02-1-4481
Goražde, 30.08.2012.godine
ZAMJENIK PRESJEDAVALAČKOG VIJEĆA
Aida Obuća, dipl.prav.

0915

Na osnovu člana 12. stava 3. Zakona o vodama Bosansko-podrinjskog kantona Goražde („Službene novine Bosansko-podrinjskog kantona Goražde“ broj: 6/10) i članova 18. i 84. Statuta Općine Goražde („Službene novine Bosansko-podrinjskog kantona Goražde“ broj: 13/07), Općinsko vijeće Općine Goražde, na 43. redovnoj sjednici, održanoj dana 30.08.2012. godine, donosi:

ODLUKU

o ustupanju vodovoda „Starac“ na upravljanje i korištenje
JKP „6. mart“ d.o.o. Goražde

Član 1.

Ustupa se na upravljanje i korištenje novosagrađeni mjesni vodovod „Starac“ JKP „6. mart“ d.o.o. Goražde.

Član 2.

Preduzeće iz člana 1. ove Odluke dužno je upravljati i koristiti predmetni vodovod u skladu sa odredbama Odluke o vodovodu i kanalizaciji („Službene novine Općine Goražde“, broj:12/12), rješenju o vodnoj dozvoli broj: UP-I/25-3-40-264-4/12 od 18.07.2012. godine i drugim propisima koji uređuju ovu oblast.

Član 3.

Nadležna služba Općine Goražde će zapisnički izvršiti primopredaju raspoložive prateće dokumentacije vezane za izgradnju i održavanje vodovoda „Starac“.

Član 4.

Ova Odluka stupa na snagu osmog dana od dana objavljivanja u „Službenim novinama Općine Goražde“.

Broj: 01-02-1-4485
Goražde,30.08.2012.godine
ZAMJENIK PRESJEDAVALAČKOG VIJEĆA
Aida Obuća, dipl.prav.

0916

U skladu sa članom 123. Poslovnika Općinskog vijeća Općine Goražde ("Službene novine Općine Goražde", broj 2/08), Općinsko vijeće Općine Goražde, na četrdeset trećoj redovnoj sjednici, održanoj dana 30.08.2012. godine, d o n o s i:

ZAKLUČAK

1. Zadužuje se načelnik Općine Goražde da sa koda – Izdaci za parlamentarne stranke izvrši isplatu sredstava iz Budžeta Općine Goražde do kraja 2012. godine.
2. Rok za realizaciju ovog Zaključka je do kraja 2012. godine.
3. Zaključak stupa na snagu danom donošenja, a bit će objavljen u „Službenim novinama Općine Goražde“.

Broj: 01-05-1-4491

Goražde, 30.08.2012. godine

ZAMJENIK PRESJEDAVAJUĆEG VIJEĆA

Aida Obuća, dipl.prav.

0917

U skladu sa članom 123. Poslovnika Općinskog vijeća Općine Goražde ("Službene novine Općine Goražde", broj 2/08), Općinsko vijeće Općine Goražde, na četrdeset trećoj redovnoj sjednici, održanoj dana 30.08.2012. godine, d o n o s i:

ZAKLUČAK

1. Zadužuje se načelnik Općine Goražde da zajedno sa svojim pomoćnicima, a u okviru svojih nadležnosti, održi zajednički sastanak sa predstavnicima HE Višegrad u cilju bolje naplate finansijskih sredstava za potopljeno zemljište.
2. Zaključak stupa na snagu danom donošenja, a bit će objavljen u „Službenim novinama Općine Goražde“.

Broj: 01-05-1-4494

Goražde, 30.08.2012. godine

ZAMJENIK PRESJEDAVAJUĆEG VIJEĆA

Aida Obuća, dipl.prav.

0918

U skladu sa članom 123. Poslovnika Općinskog vijeća Općine Goražde ("Službene novine Općine Goražde", broj 2/08), Općinsko vijeće Općine Goražde, na četrdeset trećoj redovnoj sjednici, održanoj dana 30.08.2012. godine, d o n o s i:

ZAKLUČAK

1. Ne usvaja se Izvještaj o realizaciji zaključaka sa predhodne, 42. redovne sjednice Općinskog vijeća Općine Goražde.
2. Zaključak stupa na snagu danom donošenja, a bit će objavljen u „Službenim novinama Općine Goražde“.

Broj: 01-05-1-4488

Goražde, 30.08.2012. godine

ZAMJENIK PRESJEDAVAJUĆEG VIJEĆA

Aida Obuća, dipl.prav.

0919

U skladu sa članom 123. Poslovnika Općinskog vijeća Općine Goražde («Službene novine Općine Goražde», broj 2/08), Općinsko vijeće Općine Goražde, na četrdeset trećoj redovnoj sjednici, održanoj dana 30.08.2012. godine, d o n o s i:

ZAKLUČAK

1. Zadužuje se načelnik Općine Goražde da dostavi Vijeću Izmjene i dopune Budžeta Općine Goražde za 2012. godinu najkasnije u roku od 15 dana, kada će se održati vanredna sjednica Vijeća na kojoj će se razmatrati samo ova tačka dnevnog reda.
2. Rok za realizaciju ovog Zaključka je 15 dana od dana donošenja ovog Zaključka.
3. Zaključak stupa na snagu danom donošenja, a bit će objavljen u „Službenim novinama Općine Goražde“.

Broj: 01-05-1-4492

Goražde, 30.08.2012. godine

ZAMJENIK PRESJEDAVAJUĆEG VIJEĆA

Aida Obuća, dipl.prav.

0920

U skladu sa članom 123. Poslovnika Općinskog vijeća Općine Goražde («Službene novine Općine Goražde», broj 2/08), Općinsko vijeće Općine Goražde, na četrdeset trećoj redovnoj sjednici, održanoj dana 30.08.2012. godine, d o n o s i:

Z A K L J U Č A K

1. Zadužuje se načelnik Općine Goražde da kao ovlašteni predlagač za narednu sjednicu Vijeća ponudi Vijeću prijedlog Odluke o usvajanju Programa asfaltiranja i redovnog održavanja makadamskih i nekategorisanih puteva.
2. Rok za realizaciju ovog Zaključka je naredna sjednica Vijeća.
3. Zaključak stupa na snagu danom donošenja, a bit će objavljen u „Službenim novinama Općine Goražde“.

Broj: 01-05-1-4489

Goražde, 30.08.2012. godine

ZAMJENIK PRESJEDAVALAČEG VIJEĆA

Aida Obuća, dipl.prav.

0921

U skladu sa članom 123. Poslovnika Općinskog vijeća Općine Goražde (“Službene novine Općine Goražde”, broj 2/08), Općinsko vijeće Općine Goražde, na četrdeset trećoj redovnoj sjednici, održanoj dana 30.08.2012. godine, d o n o s i:

Z A K L J U Č A K

1. Prima se k znanju Informacija o realizaciji naplate finansijskih sredstava od HE Višegrad za period 01.01.2012 – 30.06.2012. godine.
2. Zaključak stupa na snagu danom donošenja, a bit će objavljen u „Službenim novinama Općine Goražde“.

Broj: 01-05-1-4493

Goražde, 30.08.2012. godine

ZAMJENIK PRESJEDAVALAČEG VIJEĆA

Aida Obuća, dipl.prav.

0922

U skladu sa članom 123. Poslovnika Općinskog vijeća Općine Goražde (“Službene novine Općine Goražde”, broj 2/08), Općinsko vijeće Općine Goražde, na četrdeset trećoj redovnoj sjednici, održanoj dana 30.08.2012. godine, d o n o s i:

Z A K L J U Č A K

1. Zadužuje se načelnik Općine Goražde i nadležna općinska služba da kontinuirano izvještava Općinsko vijeće o aktivnostima i radnjama te svim relevantnim činjenicama vezanim za rješavanje problema oko izgradnje kuće u ulici Alije Hodžića u MZ Goražde I.
2. Informacija bi trebala da sadrži sve relevantne podatke dobivene od nadležnog građevinskog inspektora te podatke o preduzetim radnjama i aktivnostima od strane JP Ceste Federacije BiH.
3. Rok za realizaciju ovog Zaključka je odmah.
4. Zaključak stupa na snagu danom donošenja, a bit će objavljen u „Službenim novinama Općine Goražde“.

Broj: 01-05-1-4490

Goražde, 30.08.2012. godine

ZAMJENIK PRESJEDAVALAČEG VIJEĆA

Aida Obuća, dipl.prav.

0923

U skladu sa članom 123. Poslovnika Općinskog vijeća Općine Goražde («Službene novine Općine Goražde», broj 2/08), Općinsko vijeće Općine Goražde, na četrdeset trećoj redovnoj sjednici, održanoj dana 30.08.2012. godine, d o n o s i:

Z A K L J U Č A K

1. Usvaja se inicijativa vijećnice Obuća Aide, koja je podnesena na 42. redovnoj sjednici Općinskog vijeća Općine Goražde, a koja se odnosi na donošenje Programa stambene i ostale izgradnje na području Općine Goražde.
2. Zadužuje se nadležna općinska služba da pripremi prijedlog u skladu sa podnesenom inicijativom i istu uputi u proceduru.

3. Rok za realizaciju ovog Zaključka je do 90 dana.
4. Zaključak stupa na snagu danom donošenja, a bit će objavljen u „Službenim novinama Općine Goražde“.

Broj: 01-05-1-4496

Goražde, 30.08.2012. godine

ZAMJENIK PRESJEDAVALAČEG VIJEĆA

Aida Obuća, dipl.prav.

0924

U skladu sa članom 123. Poslovnika Općinskog vijeća Općine Goražde ("Službene novine Općine Goražde", broj 2/08), Općinsko vijeće Općine Goražde, na četrdeset trećoj redovnoj sjednici, održanoj dana 30.08.2012. godine, d o n o s i:

Z A K L J U Č A K

1. Usvaja se inicijativa vijećnika Bajrović Safeta, koja je podnesena na 42. redovnoj sjednici Općinskog vijeća Općine Goražde, a koja se odnosi na donošenje izmjena i dopuna Odluke o građevinskom zemljištu u cilju stvaranja mogućnosti da Općinsko vijeće Općine Goražde donosi odluku o raspisivanju javnih konkursa za dodjelu građevinskog zemljišta.
2. Zadužuje se nadležna općinska služba da pripremi nacrt izmjena i dopuna Odluke o građevinskom zemljištu u skladu sa podnesenom inicijativom i istu uputi u proceduru.
3. Rok za realizaciju ovog Zaključka je do 90 dana.
4. Zaključak stupa na snagu danom donošenja, a bit će objavljen u „Službenim novinama Općine Goražde“.

Broj: 01-05-1-4495

Goražde, 30.08.2012. godine

ZAMJENIK PRESJEDAVALAČEG VIJEĆA

Aida Obuća, dipl.prav.

0925

Na osnovu odredaba člana 25. Zakona o građevinskom zemljištu FBiH ("Službene novine Federacije Bosne i Hercegovine" broj: 25/03) i člana 18. i 84. Statuta Općine Goražde ("Službene novine Bosansko-podrinjskog kantona Goražde", broj:13/07) i zahtjeva Đogo Ibra iz Goražda, Općinsko vijeće Općine Goražde, na 43. redovnoj sjednici, održanoj dana 30.08.2012. godine, d o n o s i:

Z A K L J U Č A K

Član 1.

ODBIJA SE ponuda Đogo (Šaćira) Ibra iz Goražda za preuzimanje neizgrađenog gradskog građevinskog zemljišta u državnoj svojini, koje je u katastarskom operatu označeno kao dio k.č. 2447/2, u površini od 139 m², a upisano u Pl. br. 413/03 K.O. Goražde I, jer ne postoji interes Općine Goražde da koristi prvenstveno pravo preuzimanja navedenog zemljišta, obzirom da se predmetna parcela nalazi van obuhvata Regulaciog plana "Centar".

Član 2.

Podnosilac zahtjeva ne može izvršiti otuđenje zemljišne parcele iz člana 1. ovog Zaključka ispod cijene od 25,00 KM po 1 m², što ukupno iznosi 3.475,00 KM za površinu od 139 m², o čemu će se starati Porezna uprava - Kantonalni ured Goražde – Ispostava Goražde, kao mjesno nadležni organ uprave.

Član 3.

Zadužuje se Služba za geodetske, imovinskopravne poslove i katastar nekretnina Općine Goražde da ovaj Zaključak dostavi nadležnom organu iz člana 2. ovog Zaključka.

Član 4.

Ovaj Zaključak stupa na snagu narednog dana od dana donošenja.

Broj: 01-05-1-4487

Goražde, 30.08.2012.godine

ZAMJENIK PRESJEDAVALAČEG VIJEĆA

Aida Obuća, dipl.prav.

SADRŽAJ

0909	O D L U K U o jedinstvenom načinu raspolaganja, upravljanja i zaštiti stanova na kojim pravo raspolaganja ima Općina Goražde	664
0910	O D L U K U o prihvatanju ponude Kiraz Adise za kupovinu zemljišta i objekta	669
0911	ODLUKU o organizovanju i funkcionisanju zaštite od požara i vatrogastva	669
0912	ODLUKU o dodjeli javnih priznanja Općine Goražde	673
0913	ODLUKU o dodjeli javnih priznanja Općine Goražde	673
0914	ODLUKU o dodjeli javnih priznanja Općine Goražde	674
0915	O D L U K U o ustupanju vodovoda „Starac“ na upravljanje i korištenje JKP „6. mart“ d.o.o. Goražde	674
0916	ZAKLJUČCI	675

Izdavač: Općina Goražde, Ul. M. Tita 2. 73000 Goražde.

Glavni i odgovorni urednik: sekretar Općinskog vijeća Općine Goražde, Samir Kanlić, tel: +38738221161 i pomoćnik načelnika Službe za javne servise i tehničke poslove, Sanid Zirak, tel: +38738221796.

Štampa **GRAFOMERX** Goražde.